

緣督廬日記抄

緣督廬日記抄卷二

光緒戊寅至  
癸未凡六年

長洲葉昌熾著

邑後學王季列輯

戊寅正月

元旦得佩鶴東村來和韻詩兩首得詩一首

初二日鈔藏書紀要畢不及八千字此本首刻於士禮居沈翠  
嶺氏復刻諸昭代叢書中至述古叢鈔本凡三刻矣

初七日檢韻補得裴瑜爾雅音一條徐邈楚詞音四條又有黃  
庭經陶宏景讀疑華陽隱居本有是書音義也

初八日檢韻補徐邈毛詩音周易音並有如千條又有沈重詩  
音劉昌宗禮音周易陶宏景讀按隋唐經籍志易無陶注亦  
無音然六朝時崇尚道家如王弼何遜皆有易義則陶之音  
易義或當然又按第二卷以後凡引黃庭音切直云陶宏景

黃庭經音則是書音義陶作無疑與前易音皆定目錄時所遺也

十二日東筇卿借玉函山房輯佚書七函經典釋文校本一部  
十三日連日以韻補所引易祿與毛刻本對校頗有異同毛本  
為陸敕先所校佳處時與韻譜相合

十五日自鈔春秋徐氏音玉函山房輯本

十七日春秋音寫畢連序二十五葉

十八日續寫毛詩徐氏音亦馬輯本  
玉函山房輯佚書  
懋城馬國翰編定

廿一日

詩南山萬屨五兩箋云喻文姜與姪娣及傅姆正義引公羊  
云姪者何兄之子娣者何女弟也今公羊無女字以上的例  
之不言兄之女子而曰兄之子則弟上亦不當有女字孔所

據本非

正義又引內則云女子十年不出傅姆教之執麻枲治絲繭則傅是姆類亦當以婦人老者為之案孔氏引禮將以申箋傳字之義然考內則十年句下祇云姆教婉婉聽從不舉傅也孔氏何得自撰經文以證鄭說

甫田序刺襄公也無禮義而求大功無箋正義曰鄭以國語云齊莊僖於是乎小霸父祖已作盟會之長故欲求為霸也按此序既無箋孔氏何得援鄭意為說疑序下本有鄭箋今本脫之唐時猶未佚爾

廿二日鈔毛詩音畢連序十八葉

廿三日續鈔徐氏周易音共十葉即竣工

廿四日續鈔周易李氏音連序兩葉

廿五日續鈔古文尚書音亦徐邈撰

猗嗟正義引大射禮糝七十紆五十按儀禮糝作參紆作干  
鄭注參讀為糝干讀為紆是孔氏以注改經也鄭於天官司  
裘注引大射禮亦竟改作糝紆

葛屨正義云天官屨人說屨之飾有紃總純按周禮屨人所  
掌王及后服屨有赤總黃總青句句即紃字無言純者惟士  
喪禮云夏葛屨冬白屨皆總紃純鄭注周禮本之孔於此詩  
亦當引此為說

好人提提正義引爾雅提提安也按爾雅釋訓作媿媿蓋用  
三家說與毛異文孔引以證詩而改从手旁殊嫌專輒凡孔  
氏所疏各經如此類甚多

廿六日吳氏開館徒一人號研農

廿七日鈔古文尚書音畢

廿八日訪鮒卿相約輯古乙部書充兩人之力積十年之功可略得其端緒矣

詩言采其莫莢其采莫之士

朱十行本

阮氏校勘記云小字本相

臺本土作事是也士乃誤字按阮說非也國有桃謂我士也騶箋云士事也是士本有事訓不必改字而義自可通

三十日

詩伐檀正義引釋獸云獬子獬郭璞曰其雌者名獬獬乃刀反按今郭注無下四字當是音耳然郭又不當自音其注或謝沈諸人音辱入於此

二月

初一日訪鳳生携歸衡方碑一冊集其字作箋得雁帛書三字

又為仲平集八字曰其季在寅仲平拜上皆情鳳生雙鈞

初四日續鈔徐氏周禮音

初六日夜至長元學分獻西廡禮成東方白矣夾寫爾雅孫氏音畢

初九日夾寫郭璞爾雅音義

十二日

東門之粉正義引應劭通俗云阮氏校勘記錄滿鍾說謂當作風俗通此論未確孔氏羣經所引書名不盡一例如小爾雅或去小字文章流別論或去論字國語則或曰春秋外傳或選去春秋二字推之書傳異義無不皆然此蓋孔氏本如此非有誤也

十三日

檜詩正義引史記楚世家云共工氏作亂帝嚳使重黎誅之而不盡帝乃誅重黎以其弟吳回為重黎後復居火正為祝融又云史記以吳回為重黎謬按馬遷惟云為重黎之後不言吳回即是重黎也尋孔氏之意當誤以後字屬下讀

十五日寫周禮徐氏音畢

十六日校臨經典釋文原本為潘梅文所臨惠臧江顧諸家校本用朱墨藍筆上下方皆滿其圈點識別不可分晰惟依樣臨之而已續鈔周禮李氏音

曹詩正義云周惠王以莊十八年即位僖八年崩按僖七年左傳閏月惠王崩襄王惡大叔帶之難懼不立不發喪八年經冬十有二月丁未天王崩左傳冬王人來告喪難故也是以緩蓋惠王之崩實在七年閏月其告於諸侯則八年矣孔



氏據經書之季故云八季

十九日訪芾卿攜歸所摘葛剛正重續千字文注書林事類韵會事物紀原凡百餘條三書皆宋本也

二十日鈔郭璞爾雅音義畢連序二十四葉

廿三日從書林事類韵會事物紀原搜出內部逸書五六十種如元女戰經靈寶畢法海中星占符天纂圖陰陽書藝術圖黃帝出軍決京房逆刺占尤可寶貴惟隋唐志及各家書目名類繁多有一書而兩部兼收者有一書而一部複列者有人名同者如陸贄古書多誤為陸機有書名同者在初伏侯皆有占今注前人引書尤好意為增減不必原文往往兩書同引而抵牾百出書目亦有改異如風俗通義去一義字猶可解也并有云應劭通俗者若并應劭二字去之則似通俗文矣凡此之類不可枚

舉惟有先將漢隋唐志及各家書目彙稽博證闕疑慎擇庶可十得其七八耳

廿五日校釋文叙錄畢東希卿還馬氏書五函又從希卿處取歸楊穗崑山郡志一部舊鈔本已占一部影宋本歲時廣記一部皆從瞿氏借得者崑山郡志後有錢竹汀宮詹跋即載之養新錄者也

廿七日兩奉希卿書深以馬竹吾所輯諸書為漏略仍欲包羅四部別樹一幟並約通力合作仿承德陽湖兩孫先生之例也

三月

初三日

讀揚子法言以明世德堂本及江都秦氏本互勘之秦刻十

三卷晉李軌注世德堂本十卷增唐柳宗元宋宋咸吳祕司  
馬光爲五臣注秦本前附音義一卷無撰人秦氏定爲五代  
宋初人也兩本字句間有異同注以吳祕爲最勝李宏範次  
之司馬溫公又次之溫公詳於音訓李注雖略而發言元雋  
不減輔嗣之注老也

世德堂本即出自宋坊間纂圖互注重言重意本重言重意  
間有去之未盡混入注中者尚有迹可尋也此卷目錄後有  
論渾天宣夜諸術兩葉魚尾下標揚子圖三字當是重黎篇  
圖說未經刪削而誤附於此爾

宋咸重廣註法言序羣經之文非夫孔傳眾氏之解則章趣  
之會無適隱焉宋時孔傳即今故傳也又曰毛萇傳詩頗號  
太略夫西漢古訓存於後者惟毛公詩傳最爲純粹其書亦

完全無缺豈梅頭較近影附之學所能竊比而乃右梅左毛  
偵倒失實莫此為甚宋人無識往往如斯

咸序又曰亞聖之撰獨揚孟而已七篇有趙臺卿為之題頗  
詳真經有范叔明為之解甚悉真經指太玄范叔明范望也  
唐宋崇尚老氏如莊列諸子皆被以真經之號若子雲太玄  
則擬易而作與道家言有異矣亦曰真經得無不類

問道篇鄒言有取乎曰自持吳祕注衍之書十餘萬言然要  
其歸必止乎仁義節儉考漢書藝文志鄒子四十九篇鄒子  
終始五十六篇並列陰陽家吳祕在溫公之前能言其書則  
宋初尚未散逸而隋唐志皆不著錄豈當時民間習之而祕  
府轉闕歟

脩身篇田甫田者秀喬喬此用詩齊風語也今詩喬作驕古

今字或三家異文耳宋咸曰喬喬當為驕驕非是

初五日胡心義來受業雅眉所薦亦應童子試

初六日讀王尚書經義述聞其說易不信虞氏與惠定宇張皋文所主不合

初八日校師師入祀專祠午前往拜

十一日夜讀法言兩篇

十三日校經籍志

十四日訪鳳生暢談見有持石門漢魏隸楷求售者獨手頗精索價五元

十五日

詩七月正義引晉宮闕銘隋唐志皆不著錄以春秋土地名例之此銘字疑當作名

漢苑文志尚書經二十九卷傳四十一篇師古曰此二十九卷伏生傳授者謹案隋志云伏生作尚書傳四十一篇以授同郡張生是漢志四十一篇即大傳也

十六日校釋文第四卷畢凡遇宋諱殷敬桓構等字余所藏通志堂本皆不缺筆而潘校之本已缺蓋潘本後印其時已摺去矣間有摺之未盡者藏屬堂皆用朱筆抹余藏之釋文乙亥省試寓金陵得之宣城書估是最初印本惜為蠹魚所損携歸裝之居然整齊清朗復還舊觀矣曩季金子春文書贈余三禮圖三冊繕墨精好更佳於釋文板心無通志堂三字老書實云此初印時光宋刻者又在都中見佩鵬兩冊書實云宋刻細宋之澤存堂初印本而抽去其序跋也蓋國初時刻手極工其精者往往與宋本無二今亦無此高匠矣

十七日午後返舍復至得見齋小坐見泖生司馬同至雅叙茗話見直清及梁陽強良庭孝廉泖丈購定汲古閣四唐人集一部黃刻三經音義一部皆草塔凌氏物也又有江少虞皇朝事實類苑周益公退朝錄並舊鈔本有堯國丕烈士禮居朱記以價昂不能得購時復至館

二十日午後訪鳳生同游拙政園補壁畫畫頗有佳者鄭谷口張叔未兩聯尤為精絕又石筍一作淡黃色奇峭簡古似枯松半段阮芸臺題松身石韻圖並繫以銘

廿二日訪怡雲同至書肆閒步見成化李壘雕張伯顏本文選一部得汪刻邵齋讀書志一部

廿六日得新刻養新錄八冊老子商君書各一冊皆浙江局本廿九日知潘鶴庭作故此君年壯力強同年莫及遠以小疾遂

登鬼錄江文通云天道寧論斯言信矣

四月

初二日

前讀幽風正義引張融說疑為鄭志語按南史張融暢之子  
嘗自名其集為玉海顧歡傳亦引其所撰門律云云惟其人  
好二氏之學不聞有經說則孔疏所引恐非此張融也

論語以不教民戰是謂棄之朱注言用不教之民以戰必有  
敗亡之禍是棄其民也吳氏曰教民者教以道義孝弟行義  
此宋儒說也按何晏集解引馬融注言用不習之民使之攻  
戰必破敗是謂棄之以教為教戰謹案漢書藝文志兵家引  
論語此節文師古曰非其不素習武備蓋漢唐以來承用馬  
說也竊謂聖人之言無所不包必兼此二義乃完足無弊隋



書經籍志引作不教人戰避唐太宗諱

初五日南山母舅來買小舟偕至虎邱其新建祠堂在斜酌橋  
南尚未竣工基址不甚廣而有池有亭池側高處擬建一小  
樓可望海湧峯勾山文所建家祠即在其側後園相通隔以  
竹籬雜植梅桃數十株稍憩復登虎邱山觀劍池生公講臺  
遺跡及石上宋明人題名別蘇讀之登虎邱塔摧燬殊甚塔  
輒有武邱山字當是唐人輒避諱作武也余性嗜游每至燕  
楚皆眺其勝處金焦且三四至矣此山近在附郭而從前曾  
未一臨亦可異也復至吉公祠祀前江蘇巡撫吉爾杭阿園  
中一池極寬敞惜點綴不雅歸舍日暮矣

初六日校毛詩音義上卷畢購淮南子一部浙江局翻莊刻又  
從襄陽處鵠歸巴陵方氏新刊元本草堂詩箋一部宋嘉興

書編次建安蔡夢弼會箋附趙子櫟草堂詩話一卷曹趙  
所輯工部李譜各一卷雕印極精惟間有一二誤字卷一龍  
門奉先寺箋引韋述東都記按新唐書史部地理類鄧世隆  
東都記三十卷韋機東都記二十卷皆不言述撰述所著有  
兩京新記五卷兩京道里記三卷並見地理類儀注類又有  
韋述東封記一卷蔡氏所引疑出兩京新記或機誤述未可  
知也

論語子曰苗而不秀者有矣夫秀而不實者有矣夫集解引  
孔曰言萬物有生而不育成者喻人亦然正義曰此章以顏  
回早卒孔子痛惜之為之作譬也皆承上章顏淵說惟朱注  
不然按法言問神篇育而不苗者吾家之童烏乎李宏範注  
仲尼悼顏淵苗而不秀子雲傷童烏育而不苗是揚子即竊

取夫子之意以悼其子從孔傳也此義似較長

漢書藝文志引孔子曰所重民食師古曰論語載孔子稱殷湯伐桀告天辭也按此謂武成時事顏說甚謬師古又云言為君之道所重者在民之食按集解引孔注重民國之本也重食民之本也民食兩項並列顏注以為重民之食亦異朱子集注引武成曰重民五教惟食喪祭亦以民字貫下三項取顏說也

藝文志又引孔子曰使乎使乎師古曰數使者之難其人按集解引陳曰再言使乎善之也言使得其人朱子亦云再言使乎以重美之顏注雖異然要必有所受也

初九日購吳地記吳郡圖經續記各一冊江蘇書局本

十五日南山母舅招往虎邱祠堂勾文先在飯後同登虎邱山

尋陸羽茶井在鐵華巖下摩崖第三泉三字徑二尺餘清明  
可辨而寺僧已不知其名可數也至石觀音殿訪石刻觀世  
音經按顧湄虎邱志有九十一行宋人所書人各書一行每  
行下題姓氏官爵今僅存十之三四並多剝蝕矣石之陰有  
擘窠書釋迦文佛四字筆力橫絕末小字一行題政和甲午  
住山老朽子英書結緣共十三字復尋清遠道士詩則崖石  
漫漶已迷其處矣

宋人書石觀音經凡遇敬字皆缺末筆間有不缺者舅氏以  
為疑竊謂此必妄人所改或此碑寫者非一巖谷偃蹇之士  
不諳科律故有不同耳

十六日

李淳風乙巳占引靈憲載道志之言云有物渾成先天地生

此出老子道德經亦稱道志蓋前人於百家之言統謂之志如春秋內傳引兵志是也

十九日壽銘來附到渭漁書知粵雅堂叢書已有續刻價與初刻埒購校官碑一紙此江南第一漢碑也

廿四日訪鳳生攜歸元氏封龍山碑一本

廿五日訪希卿購漢碑兩種

衡方張連

六月

十六日讀日知錄

廿九日檢館中殘書得陸敎先校白集一冊僅存六十六至七十一六卷後有朱筆跋一墨筆跋三皆先生手跡錄於左方  
借連王所得煙客宋刻本校過竭十二日之力麓得卒業云  
癸卯重午前一日屬余懸弧之辰校畢識此虞山陸貽典筆

從葉石君借宋校本勘過兩次其與遵王本同者不另勘入其異處俱用墨筆識于上方與朱筆不相混也癸卯五月十日記

按文集後序有前後續三集則知集各有詩有文而通行今本彙三為一以詩文各從其類非其舊矣石君所見廬山本僅自廿卷至廿九卷其第廿一卷乃今本第三十八卷遞至廿九卷則今本第四十六卷由此而推至今本第六十七卷當為廬山本第五十卷為長慶集是前集也合之元叙所謂成五十卷者可信不誣且元叙自諷諭詩為始至剗剗而止符若卷契况今本二十一卷之首又明著後序為始耶但後集續集則莫知其界分為深惜之更可疑者今本通計十秩每秩卷數不等而文集後叙云前集五秩每秩十卷聖善寺

集記云七秩六十五卷南樺院集記云七秩六十七卷則分秩亦莫可考矣且文集後序云長慶集五十卷後集二十卷續集五卷共七十五卷今本止七十一卷計缺四卷若石君從別宋本抄第三十八卷為今本所無僅小詩二十八首復有重出不成卷軸宋本換次而去至今本七十一卷為七十二卷通計全數尚闕三卷古書淪失不獨此集梅卷為之三歎云是歲五月十一日勅先再記

葉石君跋云甲申秋假得錢尚書不全宋本白集校過一次又有廬山本與今刻卷目大異分前集後集別集止見一本自二卷至二十九卷用青筆改正以類推之其中有歲時日月及前後序文則廬山本卷目亦可考定也九月十日偶讀因記

昌熾又案陸校底本明姑蘇錢應龍所刻今亦僅見矣所云  
煙客宋刻本者太倉王奉常家物也後述古堂錢氏得之復  
歸奉興季滄葦崑山徐健菴今藏畧里瞿氏具見鐵琴銅劍  
樓書目

七月

初六日東蔣子餘取歸粵雅堂一部即以韻補相易者也共書  
二十集二百四十冊

十二日閱瞿氏書目略為補正誤謬

十八日讀歲時廣記琳瑯秘室鈔本亦瞿氏物也

廿三日夜檢歲時廣記按此書四庫著錄圖說已佚今是本完  
好不闕特錄其目於後以為攷古之一助焉

月令主屬大全圖說

氣候循環易見圖說



日出日沒永短圖說

月生月盡盈虧圖說

經星昏明迭見圖說

閏月成歲為章圖說

玉衡隨炁指建圖說

招搖逐月推移圖說

日月次舍交會圖說

陰陽變合消長圖說

律管淺深氣候圖說

律呂損益相生圖說

春季氣數悉備圖說

夏季氣數悉備圖說

秋季氣數悉備圖說

冬季氣數悉備圖說

爾雅十幹歲陽圖說

爾雅十二歲名圖說

爾雅十幹月陽圖說

爾雅十二月名圖說

廿四日曉文子辯義兩冊浙江局本

八月

十五日題携琴訪友圖五律兩首

廿八日慈闈五十生辰堂上不允稱觴先行出避屬城依舊到館蒞弟亦赴莊

九月

十一日沈生來受業名爾梅字梓仲海甯人鳳生所薦

十月

初九日訪推鄉丈託覓寫官錄崑山郡志並吳社篇

十六日訪紱卿見元刻列子逸周書各一部又千金要方一部

三十卷李燾續宋編年一部劉時舉續宋中興編年一部並元

刻

十八日觀歲時廣記畢摘出唐時佚書數十種六朝以前寥寥

無幾

十九日詩已占畢

廿二日

歲時廣記

卷三十八

引易緯通卦驗以迎日至之禮有鄭注云從

者就也冬至君臣大司樂之官臨其肆樂祭天圓邱之樂以  
為祭事莫大於此按今易緯此注已佚

蔡夢弼艸堂詩箋

卷一

引學林新編云注此詩者曰梁安成康

王秀傳兩韓之孝友純深庾郭之形骸枯槁或稼飯菁羹惟  
日不足或葭牆艾席樂在其中按今湖海樓所刊學林無兩  
韓云云二句

卷二今夕行注引章懷後漢書注曰鮑宏博經刻為一畫者  
謂之白刻為三畫者謂之黑按原注當為三句刻為一畫者  
謂之塞刻為兩畫者謂之白此脫謂之塞刻為兩畫七字而  
以一畫為白耳

十一月

初一日得希卿東代購汗簡一部一隅州堂本楮墨極精作偽者去其首葉假充宋刻又得通聲東送來本州一冊屬撰跋尾

十三日校瞿氏書目

十四日校瞿氏書目

十九日作七律兩首題潘碩庭藏遂園楔飲圖和西園師原韵  
廿二日讀困學紀聞自後以為常課約日盡十葉而止

廿七日得希卿東附來職官分紀一部

廿八日燈下校新鈔吳社篇吳郡丹青志梅花什並王百穀撰書不甚精以為郡中掌故錄藏篋中楊諱崑山郡志亦鈔跋

十二月

初三日撰明成化刻重脩政和本草跋一首通聲所委得希卿書寄來堯國跋數首前得其書云述古書友携來抄本五種求售一為陳瑒九章直指一為朱右曾詩地理微一為無名氏國語翼解其兩種則忘之矣

初七日得希卿東並送來抄本五種其一為校經述微長洲張霞房撰據希卿云是錢晚微之弟子其一為十三經識字仁和金廷柏撰近於鉅釘極無謂國語翼解板心有學福齋說經稿六字其撰人當可攷而得也

十一日致希卿書得復偕歸沈欽韓左傳補注一冊沈字文起蘇之木清人記問極博其所著尚有兩漢書疏證三國志補注王刑公詩注范石湖詩注並未刻兩漢疏證校邠廬藏有抄本關數卷木清徐氏所藏則僅有列傳而已此左傳補注

本潘梅丈物後歸翼甫希卿從之傳錄余亦擬別錄一副又東翼甫借歸周叔天官書注一冊亦鈔本周子儼則郡人十二日昨所假天官書注篝燈讀一過其書近於批尾家無足采也

十四日見希卿云述古書賈復携鈔本二種來一為詩補考無撰人意在補王深寧詩攷一為學福齋經義非全本陳六九所摘存其跋云是吳淩雲所著以此推之國語翼解是亦吳氏所著矣希卿又云經義述微索價廿四元勢不能得夜歸錄其精者若干條得四庫未收書目提要一冊壹百文十五日錄校經述微其中改竄處有沐業沐謂等語所謂沐者不審何人改筆竇勝原文

十八日秦季丈五十壽誕借聽事宴客諸同年皆集晚間

下鑊

租戶不成於大茶廳三椽盡付一炬諸親友聞警相率皆至  
幸大廳圓牆堅固風勢又小即時撲滅然一時驚皇之態已  
不堪設想矣家堂神主亦燼於大觀躬涼德災及祖宗迫已  
自省輒復痛心刺骨惟有閉戶思過益加修省而已

廿一日夜以災故特設家祭

廿七日曩得元刻本韵補畧勘一過時有所得兼藏匿中今其  
書已售於人檢出錄之

一東禽字注云禽渠容切易林吉日車攻田弋獲禽宣至飲  
酒以告嘉功以爲禽與功韻可入東部之證不知古人用韻  
不必兩句相間焦氏此又以首尾韻攻功是也而中間日與  
弋車與嘉亦韻禽字未必韻也

五支謀字注云荀卿成相篇聖知不用愚者謀前車已覆後

未知按今荀子患難哉句阪為先聖句知者不用愚者謀句楊倞注云阪為反反先聖之所為是楊以聖字純句吳氏誤屬下讀而又行一者字或所見荀子不與楊倞同

十七真甚字注云開封五經文字封元之誤

又門字注云荀卿賦往來得應通於天神出之甚亟莫知其門按今荀子亟作極楊倞注云極讀為亟急也此運改作亟非

又墳字注云一作墳風俗通引毛詩天之牖民如墳如麓按毛詩牖字應劭實引作誘兩字音義同

四紙改字注云更也說文改已聲讀若己張衡憂思賦願竭力以守謹兮雖貧窮而不改按說文支部更改之改篆作改注云从攴已又殺改之改篆作改注云欵改大剛卯以逐鬼



魁也从攴己聲讀若己兩字同在一部而偏有迥別吳氏誤  
謂後改字為前改字

又𢇛字注云𢇛也說文從來臣聲徐錯曰今俗作𢇛按𢇛俗  
字當作𢇛說文从木在木部此云從來誤

四十四有考字注云說文以𠂔得聲又曰𠂔音模按說文老  
部考从老省𠂔聲苦浩切𠂔部𠂔氣欲舒𠂔上礙於一也苦  
浩切無模音不知才老何所本許君之例有用讀若某者有  
用讀為某者反切且未嘗有况直音乎

去聲邁字注云力制切說文以𧈧得聲許慎讀𧈧如屬按說  
文是部邁从𧈧省聲莫話切又考虫部𧈧毒蟲也丑介切或  
从𧈧作𧈧無屬音惟𧈧下云𧈧屬从虫𧈧聲讀若賴

賴與此  
屬同此

字今俗作𧈧非邁所從得聲之字才老蓋誤以𧈧之𧈧為

毒蟲之蔓也

己卯正月

元旦瑞雪

初二日傳錄釋文校本筆凍而止

初六日傳錄釋文校本周禮畢

初九日校儀禮音義畢

十七日校禮記音義畢

十八日力疾開館即返舍朱恂甫來受業名積熙年二十歲結核久不散便輿訪針科孫翼周請治其針用竹筒先以布囊置水中煮百沸投筒於中復以小刀刻患處僅去其皮不及膜乃以藥筒安其上自黏不脫久之取下筒口血色甚殷云是淤血去之斯愈矣曩年襄卿趙師患痛風皆以針得瘳

惠往試也

二十日佩鶴送來新刊養一齋文集一部武進李兆洛申耆著  
曾孫陽羨貲重刊

廿五日夜讀薛文清讀書錄盡一卷

廿六日聞熊純叔訃新正初四日沒於豫中眼次不禁為誦江  
文通天道寡論之句

廿七日讀薛文清讀書錄竟第二卷

二月

初四日前託柳塘購白虎通疏證一部句容陳立著淮南書局  
刻據據該洽而於古今文源流派別言之尤能鑿鑿

十五日校春秋左氏音義畢

廿八日昨吳夢蟾送姚文球來受業名玉衡新游序

廿九日綏之來攜四書樣本見示毗陵劉氏新梓出售充賑價  
八百文為購一部投貽兒讀之他日知此書自捐賑中來未  
始非開發善端之助也

三十日訪雪門並見笏齋云藏有元詩選癸集底稿板心有秀  
堃堂校刊本字增詩幾及一半蓋尚是未刪定本也以此推  
之他集當亦多於刻本未識天壤間猶有存否又有吳郡圖  
經黃堯圖校本

三月

初四日家嚴五十壽不准稱觴

初十日訪鳳生其家祖墳在虎邱曾有雜害新延獵戶兜擒未  
獲余家先塋在紫石山亦有雜洞四圍不下十餘穴曩年費  
數十千文悉行填平曾未三年而出沒如舊矣因與鳳生約

設有成效當依法治之也

十七日讀卷施閣集

廿二日夜讀漢書衛青霍去病傳

廿四日薄暮訪鳳生聞其家羅種尚未淨絕余家祖塋卯山西向兼乙辛三分今年適逢歲然只好以待來年矣

閏月

初六日購春暉堂叢書一部

初八日過世經堂書肆見抄本春秋攷巖下放言避暑錄話皆吾家石林翁之著述也春秋攷簡端有汪闡源印又有相山野錄資暇錄洪炎西渡集並抄本復至漱菰齋刻字鋪見瞿氏新刊書目已成十七卷又見湖州陸誠齋新刻史炤通鑑釋文出自宋刊本頗精審其底稿即士禮屋物也

初十日得碩庭東附淡生堂書目前四冊簡首有顧澗蘋鈕匪石兩跋云是袁綬階物又有五硯樓顧廣圻印兩朱記以余所見鐵琴銅劍樓藏本殊不逮此

十二日到館校錄公羊音義畢東翰卿借歸暴書雜記二冊嘉興錢警石所著於藏書讀書抄書校書之法言之極詳有志樸學者不可不寓目也得江又吟東募助戈侶仙葬費戈君與余同案義所不容辭

十三日去季鈕匪石先生之孫來館中携先生所纂公羊義例殺梁精義左氏類鈔三種見示欲乞人刊本余謹度篋中今檢出讀之雖無發揮然條分件繫綱領秩然左氏類鈔前有叙殺梁精義後有跋並錄於後 左氏叙云許氏說文叙曰魯恭王壞孔子宅而得禮記尚書春秋論語孝經又北平侯

張倉獻左氏傳王氏震澤長語載劉向別錄云虞卿作抄撮  
九卷授荀卿卿授張倉故左傳出於張倉家然則漢初中祕  
僅有抄撮後得河間獻王所獻古文始為全文耳漢初治春  
秋者專尚公羊其修左氏者張倉賈誼張敞等數人而已及  
至劉歆校中祕見左傳而好之請平學官諸生難之未得也  
訖乎元帝時始立於學然後學者著焉抄撮不傳古文亦佚  
今所傳者蓋劉歆所見之本也左氏發凡義例與公穀不同  
而叙事詳盡徵引口博晉之乘楚之傳机蓋所見獨多也余  
性不能強記於是撮其大要以類相次分為十卷名曰左氏  
類鈔取便記習非敢當著作也發凡一書故二大事三會盟  
四戰伐五文異六古義七典  
禮八口辭九編語十以上目錄見叙  
後漢又有名理一冊實十一門也 穀梁跋云鄭康成六  
執論曰穀梁善于經余既錄次公羊義例以備所索復求穀

梁精義錄為二卷上卷意旨皆公羊所未備者其下卷則取  
事體相類別為六門而凡公羊已備者略焉樹玉謹誌 余  
前偕節卿輯錄非石子日記一卷寄鄭金司空刻入清喜齋  
叢書後附雜文數首此兩篇當時未見故闕焉明年公車或  
携入都補刊之

按穀梁精義上卷有自記一行云乾隆五十五年四月初九  
十二日錄畢左傳類鈔目後一行云乾隆五十五年五月鈕  
樹玉誌見兩書之成不過一月耳誌於此以見先哲用功之  
勤為不可及也

十四日校錄穀梁音義畢

十五日校錄孝經音義畢

十九日校瞿氏書目終一卷研農歸云前月師課詩題汪汪若



千頃破

出范史黃憲傳

某生詩中用汎濫字山長以為汎濫之誤而

抹之某生執卷與山長為難以為即用憲傳語當讀如軌檻

兩音並見爾雅山長無以對引咎而已竊謂抹者固屬孟浪

而用者亦未必是攷憲傳譬諸汎濫雖清而易提章懷太子

注爾雅曰側出汎泉正出濫泉汎音範濫音檻不知爾雅寔

从汎凡經傳从九从凡之字絕然兩音斷不可通而其形易

混

周禮陰軌誤陰軌之類不可攷舉

此非爾雅異文乃是章懷誤認爾雅汎

字為汎遂引以注漢書耳惠定宇云汎俗作汎不知章懷既

出範音則范書本不作汎可知亦非礪說要之此傳汎濫本

與爾雅汎濫音義全別未可合而一之也當引孟子汎濫於

天下以釋之汎與汎同

二十日校書目一卷憶在武昌柯異翁為余言刻書之佳者不

在梓氏而在校者苟能精校不患非佳本也此言良是

廿一日奉安家堂並先代神位又承清翁重為懸匾午後至世經堂見毛鈔金壺記紙墨精好信乎汲古閣物也得頌庭東並士禮居跋數則

廿五日余藏有世說新語兩冊叙跋皆闕以清翁所藏核之蓋同出一本吳郡袁氏刻也清翁本較前其目錄後增高氏緯略一則又一行云萬曆丙子歲雲間王氏湘雲堂印行按袁聚原叙云刻於嘉靖乙未去丙子四十一年當是袁氏版成之後轉歸王氏耳余所藏則王氏一行又削去而於其下增毛氏金亭四字蓋此板又自王而毛矣

廿九日校艸堂詩箋引秦州記無撰人隋唐志皆未著錄章氏攷證補列其目復引太平御覽云郭仲彥撰又引選注一條

亦無撰人而此條獨未採

三十日校莊子音義畢

四月

十一日請汪容甫述學削膚存液孫洪非其敵况餘子乎

十三日怡卿東來招赴其齋見嚴子範送來出售樣本十餘種  
元詩選印已漫漶宋詩鈔尚佳

十五日侯念椿來携示抄本中論一冊從明嘉靖青州刊本傳  
錄以鄂中新刻勘之無甚異同簡端有黃丕烈印堯圃朱記  
篆紋纖弱與諸所見皆不類作偽者所為也

二十日燈下校詩地理微畢共二卷林屋費君所抄約費筆資  
四元

廿九日閱郵抄安徽學政新簡孫臺山侍郎知之主與叔字先

生病歿泗州試院哲人之萎能無泰山梁木之感乎

五月

初六日校爾雅音義畢並照錄其跋語此書自去年二月初始斷手於今月十六周矣其間疾病火災無不備歷雖作輟不時而卒以藏事有志竟成亮哉斯言

十一日夜校瞿氏新刻書目

十二日夜校書目

十三日夜校書目

十四日竟日校書目

十五日訪希卿復携歸書目兩冊屬為讎校

十六日請陳龍川集其所著高士傳忠臣傳義士傳謀臣傳辨士傳英豪錄中興遺傳集中皆有叙今檢書錄解題焦竑志

竝不著其目各家藏書目亦無之蓋在當時已佚矣

十七日夜讀龍川集有與朱子書羅列所遺物有蘇牋一百吾  
吳所製之箋在南宋時固已貴重若此

廿一日訪熊鞠生携歸純叔文集篝燈讀之一種渾穆之氣仿  
彿同寓校邨廬中促膝談笑時也

廿二日夜讀昌黎集

七月

初七日見孫吉甫淵如先生之孫與談平津館舊事並未刻著  
述皆不甚了了真有虞世南兒之歎

初八日午後訪渭漁新自粵歸

十一日張純丈來贈新集影宋管子一部

十二日芾卿招飲席設奇聞小築見荆禮卿吳蔭南申季渭漁

禮卿云新刻集韵攷證見遺一部留劉恭父同年處當屬渭老往取也

十五日購古經解彙函一部粵中刻本春秋繁露一種原為江都凌曙注本今以抱經堂校本易之與前印行者不符異時目錄家又費一翻攷訂矣

十九日赴範卿之約見禮卿緩卿禮卿出示文選箋證三十二卷續漢胡震煥枕泉著抄本未刊前有朱右曹序及自序廿一日清翁云新得金荅人刺史書熊純翁專祠已蒙豫撫奏准從此大河南北家家尸祝矣

廿四日訪鼎孚見東林外索四冊抄本題鹽官談遷瑞木輯皆摘古書僻典而不著其所出亦無門類一無所用之書也

朱彝尊南京太常寺志跋襄海甯談遷瑞木館於膠州高閣

老宏圖邸舍借冊府書縱觀因成圖推一部撮其遺為棠林  
雜俎中述孝慈高皇后無子云云據此則雜俎所述當是明  
代掌故而外索則輯錄古書棠林或其自疏庚辰夏五偶檢  
曝書亭集補識於此

廿八日鼎孚有東來附至錄本三種託定價直文選

海錄  
軒本文丞

相集

國初史記索隱  
刻本

八月

十二日得心吾所農書知購定潛研堂叢書趙刻水經注茗柯  
遺書各一部計值賢人之數

廿一日戌刻次子生

九月

初一日得申季書送至集韻正一部即禮卿所贈

初二日購校勘史記集解正義索隱札記一部管子校正一部  
並金陵局本

初九日訪申季同訪族卿因族卿新遭溘病不及細談忽忽即  
別從申季處借歸校宋本列子一部擬過校又張忠烈集一  
部擬傳錄渭漁贈光孝寺經幢拓本

十五日晨出探榜信尋鄉得雋樛園子明亦捷

十六日全錄來知寶應劉叔儉恭冕亦獲雋為浮一大白

十七日至廟堂巷唁菊屏尊人之喪其所居之屋規模極大而  
頽廢不堪云是明徐念陽先生舊宅

二十日知北榜信佩鶴中奎百廿二名

廿六日鳳生來以新搨怡亭銘見贈李陽冰篆書

十月



初一日南山母舅來招游虎阜至其祠堂小憩亭榭池沼結構一新迤東小樓與海湧峰相直憑欄遠眺可以攬其全勝余頗之曰笏翠薄暮返舟至半塘橋登岸步歸頗形倦憊次子生已逾月矣將命名 家大人命定十六字以別世系曰恭孝家承文章世守惟賢是寶為宗之先即命長子曰恭詵次子曰恭謏

初八日梓仲携抄本經義司南見示共四冊題姚江許 金丙仲撰前有玉峯張魯唯序天台胡夏客肇敏跋其書專講小戴記鸞壁虛造近於今所行講章寔無足取惟張係明季進士與之同時計在三百年外而丹黃粲然猶是當時手蹟亦弄藏家所不廢矣

初十日有罷民某舊與荔弟有一面之識糾黨四五人登門圍

詐不得已指送保甲局斥釋此等事嚴則召怨寬則長惡頗  
難得其平也

十七日訪渭漁出示墨蹟數種其一為明崇明醫學訓科杜恒  
菴墓志銘及其妻吳氏墓表並王文恪公撰書又伊墨卿吳  
山尊張船山諸家楹聯

十八日心吾來繼沈君所抄澹生堂書目全部潤筆計不逮五  
元

廿三日訪周師知浙江婺州有揭竿起事者此宋方臘故區也  
雖像謠傳杞憂頗耿耿也

十一月

十一日得于皋東左傳補注鈔竣合洋六元

十五日東新園文借歸亭林餘集一部抄本彭尺木所編共文

九篇手札六首夜校澹生堂書目

廿六日新吾來携有臨本醴泉銘一冊款署宗室永良書書法剛勁亦天潢之秀也

十二月

十六日已初譔兒孺觀其臨終之慘不勝紙牘之悲矣

二十日叔父舉一子命名曰昌駿

廿五日校澹生堂書目畢

廿七日至如意閣議儒門助喪會事集總十人每總募散十人

非名列膠庠者不與如遇寒士身故或祖父母父母妻子等

喪無力斂葬者準助一會共錢二十千文

總散一百十人每人收二百文

幼穉者助錢五十百文

每人收五十文

校左傳補注至第五卷得

心吾東張忠烈公集抄竣潤筆洋兩元零

廿八日校左傳補注

廿九日校左傳補注十二卷畢

庚辰正月

元旦竟日未出校左傳地名補注六卷

初二日校左傳地名補注至十二卷畢惟第一卷首七葉寫手粗率挖補甚多當重抄也燈下復校張忠烈公集四卷

初三日午後校張集至第七卷

初四日賀節從族鄉處借歸葛立方歸愚集一冊抄本勞氏季言用朱綠筆校

初五日午後校張忠烈集畢共十二卷申季校筆及大梅山人勘正語並傳錄眉端

初六日夜傳錄列于校宋本

十六日各廟進香至蔣廟求籤得第二十四籤下下 慈闈  
深以為憂然當茲歲年遽以一籤而阻北轅亦非人情殊覺  
進退維谷也午後訪家岳知得京報新選蒲縣教諭其地民  
貧土瘠歲入不過二百千文且相去千餘里盜賊淵藪行旅  
裹足其勢決不能往捐數六百金盡付東流家岳不能無悶  
悶即有觀者亦代為扼腕也

二十日繭卿至蔣廟代余求一籤甚吉 慈闈疑始釋

二月

初三日啟行康吉送登舟同伴劉驥雲王鉅卿蔣康甫陳菊坪  
皆同年也

初五日抵申浦寓永安街義和客棧

初八日閱申報有拍賣宋元本書籍者在義泰洋行偕同人往

觀惟唐文粹朱子全集兩本頗似元刻其餘澤存堂本篇鈔  
江本篆尚書亦佳

十二日豐順輪船進口即寫定客位運行李下舟

十三日黎明開行

十六日早晨抵紫竹林質卿丈先一日到寓招商局即下船來  
問訊僱小舟至河北街寓宏盛店家岳及鼎孚諸君寓三順  
店相隔僅數武

十七日循例謁李爵相

十八日由店中僱定車五輛連房飯共錢八千文中堂饒曉陸  
兩海關道鄭觀察二兩天津道吳觀察兩元宜刺史兩金  
十九日午前登車行六十里至楊村雷家店宿所過田畝低窪  
之處仍為水浸想文安一帶其災當更劇也

二十日行六十里至河西務夫復登程忽大風揚砂天地皆黃風沙搏擊如波濤洶湧聲如萬千軍馬奔馳蹴踏聲耳目口鼻無不飽飫沙土覺瀛海一舟轉無此驚悸也勉強行四十里至馬頭宿下車攬鏡自照幾無人色矣

廿一日平明開車行五十里至余家園尖復行二十五里抵都進東便門到寓在內城半壁街呂祖閣共房五間廣庭平城氣象極宏敞惜茶水一切均須自備廟中羽冠又夜郎自大不受指揮未免納形不便耳

廿五日至廠肆瀏覽見元刻柳柳州集一部

廿九日緩卿行篋中携顧南雅詩集一部抄略閱一過前有陸方山王亮生諸先輩題字

三月

初六日午後僕被至慈雲寺見石麟昆季登殿瞻眺中供釋迦像而傍一小龕奉至聖及四配像可謂無忌憚矣殿側銅鐘明萬歷丙子年鑄錫太監劉忠胡濱潘柯楊志諸人姓字當是佈施資冥福者

十七日江震館長班來知洪琢君同年因瘋自縊不勝駭詫十九日至琉璃廠購漢隸字源一部紋三兩

廿五日質丈伯淵來同游上苑先至北海由琉璃門進喇摩皆出輟經諸殿靜閉皆不得入僅至一處閣凡四層中塑佛像其像自最下一層直至最上一層約高二三十丈兩腳所踏皆佛像也又至浴蘭軒快雪堂兩壁嵌法帖幾滿出由微徑行至華藏界一閣高閉屋之四周皆嵌小佛像稍憩登白塔為苑中最高處憑闌眺望禁闌宮殿隱約可睹上有智珠正



覺兩殿均未瞻仰既拾級下沿堤而行兩旁土阜層疊槐柳夾道所謂瓊島春陰也出門餘興未盡復至圓殿守者導游各處壯麗闕偉殆無與比庭中碧玉甃尚是全源時物築亭以覆之石柱四圍遍刻諸臣題詠又一古括廣陰敵許亦數百年物也守者復導游西苑至寶月樓又至春藕齋壯麗不逮北海而華美過之又至豐澤園中有圍屏八扇用象牙玳瑁瑪瑙諸物琢成故事雕鏤精巧栩栩如生可謂人巧極而天工錯旋至瀛臺鏡光閣小憩波光雲影微風襲人如入清涼世界同人將至紫光閣因導者索賄太多且時已暮遂作罷論登車回寓

廿九日午後偕緱嶢雲康甫同游隆福寺百衲鱗萃士女如雲彷彿吾鄉圖妙觀購歸說文疑疑一部江陰孔廣居撰價

京泉六千文又見穹窿山志一部惜忽忽未及問津

四月

初七日至廠肆購乾隆蘇州府志一部又在寶森堂見元本朱子成書題廬陵黃瑞節附錄彙文公所撰家禮易義啟蒙及校注參同契等書都為一編上有須溪劉將孫序

十二日明日挂榜之期循例今日先見紅錄同人望至日哺幾於山窮水盡忽報者至知帶御獲雉既而季雅處信來知醉丈壽卿陳桂齡桐鄉張韶生是阜皆捷聖駕之馬見屏孫陽惟有捫心自咎而已

十三日閱金錄知季雅亦中式直隸王懿榮安徽汪宗沂浙江李慈銘黃紹箕並入珊網豈將留余一人為異日櫛中生色耶無聊之極作此大言不禁破涕為笑

十四日緩卿移硯穀夫寓

十五日晨僱單套車出京至通州寓恒泰棧即僱定赴津船一隻價十二千

十九日午刻抵津至紫竹林登豐順輪船船價統艙十兩零五錢由佛照樓寫定

二十日未刻開船波平如鏡時至艙面眺覽

廿三日申刻抵吳淞轉瞬泊岸暫至新橋記客寓小住

廿五日偕康甫同出僱舟一隻價四元六角午後下船

廿六日順風平明開舟薄暮離崑山十里即覓小村停棹流水小橋極爲幽勝

廿七日午後抵蘇

三十日得覆試信知緩卿一等第二

五月

初二日閱報知敕御得二甲

初四日聞熊鞠生散館殿軍而在京時潘振聲孝廉大挑不取會試旋又報罷兩人於賑務最出力天之報施真有不可知者矣

十六日閱邸抄敕御得館選壽卿李雅知縣

廿七日謁趙師見仁齋直指一部有嘉靖庚戌余經序云朱君惠齋所刊即四庫所收朱崇正本也

廿八日亭午鳳生來云蔣錦生以明王雅宜自注易經素本屬渠跋尾薄暮因往觀之其書有作文云云又有單出此題則當如何云云直是舉業家兒圖冊耳惟書法圖勁秀媚逼真鍾太傅中夾一紙云舊有文文肅文彥可兩跋題籤係王若

林手蹟今皆失去不知誰氏筆也又見明文元發手鈔孝經一部有元發三楚精神子排諸朱記末葉後題云萬曆乙亥孟冬書於慈雲室

廿九日檢文徵明甫田集有王履吉墓誌銘云履吉八試錫院不利手寫經書皆一再過易經注景為其手蹟無訛矣又檢蘇州府志文震孟傳父衛輝同知元發字子排以貢選浦江知縣遷衛輝同知乞歸卒鄉人私謚端靖

六月

十三日訪申季近日耽於禪學頗以此事聳息未敢附和也季雲來東問周禮諸本以何者為善答以福禮堂本及金陵局刻

七月

初三日頤卿母舅屬撰舅公封股事略將寄硯生給諫入奏因  
即原闕節略比次成之

十四日作貝氏義莊記

八月

初五日見王卿月知版卿已歸里

十四日為王潤之撰其尊人節略一篇

十七日家岳赴蕭即出闔門諮別

廿四日舊鄰張小軒來云吳子和宋珊室兩君在救生局有事  
見招亟往赴之則以介山表母舅之姪女現隸姚姓為樂藉  
欲設法拯救知余親串引為邪許之助因即往招介母舅議  
定廿六日子和在花步留園請客折柬招女侍飲因而獲之  
並繕定呈稿兩扣

廿六日酉午先至留園煮茗以俟介母舅偕其姪文先來及葉  
仁伯昆季張新之翁婿先後來直至日晡子和始來錢女果  
從即突起擒之交保押送進城帶卿先至吳縣署謁碧公道  
達此事適碧公下鄉勘荒見其文郎託暫交安節局收管俟  
碧公歸後斷結初頗唯唯既審有梅姓幕客出為欄阻堅不  
收呈躊躇再四仍由余及緩卿作札自送安節局司事蔣公  
託言重規夜不啟室堅拒不納因送至介母舅家交三鼓矣  
廿七日眾議不及待碧公即在長署控告介母舅一粟外附親  
戚一粟余迫於公論不得不具名是日萬邑尊即提原告庭  
訊同人皆往看審錢女雖濡染惡習野性難馴然姚姓賣娼  
情事則固直認不諱矣訊後其女仍交錢氏收管

廿八日平明介母舅來云其女歸後舉動失常再四盤詰始知

蚌已懷珠今因疊遭驚恐勢將墮地家中拘於禁忌此事斷不可行因即訪宋珊室託暫租內屋一間在醋坊橋河沿即將女遷至新屋牀蓐一切草草安頓同人見事出意外無不焦頭爛額午後復訪希卿並見壽卿相與商定一票由希卿夾帖補送申明此事並催提案訊結

廿九日午後至希卿處壽卿已先在黃昏返舍是日奉母竟舉一女

九月

初一日萬邑尊提案覆訊將開設妓院之姚某枷號頭門一月其女之母出頭幫訟掌責二十女因初產未免到案即發希節局收管所生之女發育嬰堂撫養案遂判結

初九日晨姚鵠錢母糾合不識姓名婦女六七人至介母舅家



喧擾並有地棍多人四處策應聲言劫奪下舟即行赴滬因  
往拜萬小亭又以勘荒下鄉遂同壽卿訪保甲委員馮君蓮  
塘由局中飭差將姚錢交保管押是日紱卿清卿皆來忙亂  
竟日

初十日晨至紱卿處仍託紱卿訪萬小亭閩人堅拒強而後進  
復遞一呈以糾眾劫人為詞黃昏差票出姚錢並交官媒  
十一日午後訪節卿萬石君提審七十鳥掌責四十錢毋押交  
安節局此事甚從輕辦富有為之緩頰者其人雖不可知要  
之全龜壻也

十二日偕少華南山兩母舅至虎邱祠堂勾文已先在希節局  
董事陳君子誠即在祠堂間壁因偕勾文往訪之據云局額  
已滿當為設法安頓

十八日勾文來薄暮復得其書云希節局董事陳子誠來追改前議以額滿無可位置為辭作書致緩卿託催照會

十九日訪醒如文託函致陳子誠轉囑前事午後返舍知縣差持照會已到錢氏即行送女入局遂偕新之先至虎阜子誠不在局見其司事兩人再三申說始允將女暫為安頓

廿四日得希卿東送至邑侯文校釋文一部又未校一部屬覓人過錄云是謝禮卿所託

三十日薄暮訪鳳生即返舍知今午有人至希節局其女司事某為姚氏勾通出語不遜聲言欲將錢樹子送墮火坑不勝詫異適張新之來云探聞七十烏曾於廿五日前到局一次與女相見號咷大哭局中上下女人皆已鑄成一氣余聞之憤極善堂聞葦至于如此一人一家之事小將來吾郡公事

不可問矣

十月

初三日訪介母舅並見勺丈議局中人親事

初七日夜介母舅來知希節局遞呈縣中以屋少人多為辭請飭錢氏將女領回已批准矣

初九日至介母舅處見勺丈共繕一呈覆縣聲明目下議婚請緩兩月由錢氏領回即訪穆如丈屬以媛卿東來送購拜經樓經籍跋文一部

十三日孫菊如送來縣批前呈寬限兩月已經照眼前又可敷衍矣

廿九日午後訪怡雲知渭漁廿三歸里翰幕甚失所望即偕赴觀前茗飲見媛卿留仙媛卿在苑見舊抄本北山小集僅祇

十元惜未購也

十一月

初六日得希卿東知有校正府志之役毅迫甚至勢不能辭矣  
初七日訪緩卿並見申季議定府志如必欲謹諉力持不改體  
例不校字體略就顯然悖謬者糾正之而已

初八日肖農太守招飲議府志事申季質文緩卿皆集肖述  
中丞意並無苛求一切可如所約因將全書四分均派余分  
得公署學校增廟寺觀擇道五門並選舉職官原纂候共十

七冊

初九日得費屹懷東以董方立遺書並杉華館駢文五冊見贈  
前怡雲贈謝刻荀子一部尚是初印本精采煥發真可寶也  
十六日亭午偕芍齡昆仲坐小舟至緩卿處賀懸扁之喜見申

李同訪卽亭略談復至坂卿處夜飯抵舍交二鼓矣

十二月

初四日知陶芭孫作古此君雖不羈平心論之實美材也

初五日作王氏義莊記一首

初六日作王秋情封翁傳一首

二十日東希卿同村去釋文校本兩部一新吾所傳錄也

廿三日午後至觀前購陳伯玉集一部四川刻本

辛巳正月

十二日薄暮至文樂園為坂卿祖帳

十五日知西園師病頗劇昨託申季線去郡志職官壇廟清稿  
都五冊草稿都七冊皆新年校定者也

十六日東繆筱翁村去士禮題跋三冊並草稿全

十八日碧瀾刺史招飲南午赴之見質文子明又見碧翁之弟仲海憶前四年曾在泖生文處同席今將赴甘肅需次

廿一日東申季繼列女二冊草稿三冊

廿三日包鳳伯來問字名家駒

廿八日晨訪卹亭以新購抄本兩種見示一為曹子建集金陵朱結曾所輯一為方言疏證嘉定錢鐸撰

廿九日東管申季繼郡志五冊

揮道公草稿全又質文屬繼雜

記三冊

二月

十三日東申季繼府志學校一冊選舉四冊草稿八冊凡兩閱月而斷手

十四日讀班書展卷

漢書武帝紀元封三年春作角觝戲文穎曰漢後改名平樂觀案此條注與正文不相蒙當移下六年京師民觀角抵于平樂觀之後

廿五日屈師竹以煙霞萬古樓文集兩冊見贈氣格甚卑不過明人打油腔也

廿八日訪芍園年丈附來城北書為大蔡說項其言穢而且鄙嗚呼太史公不如牛馬走

廿九日吳錫梅來攜其始祖彥行公名敬學家傳所表見示屬補入志傳係汪遜翁筆云以宜興教諭改蘇府教授明成化進士然攷舊志題名職官教授無吳敬學此當補也所表題東海一老徐柯撰柯係文靖公沂之次子侯齋先生之弟字貴時年十五補諸生文靖殉節後杜門不出晚自號東海一

老今觀此表後僅題甲子而無紀年蓋依陶靖節之例與侯  
齋先生可謂難弟難兄矣舊志稱其工詩精書法稚梅云此  
石現尚完好異日當爲其搨一本爲臨池助也

三月

初一日夜讀漢書

初七日午後驥雲康甫同訪駿叔觀任渭長畫冊葉一百二十  
幅係其避地甬上時取大某山人詩或兩句或一句繪爲圖  
用筆之奇突設想之變幻傳色之穠艷恃心眩目幾於拍案  
叫絕猶憶山鬼一幀含啼窈窕披薜荔衣擁辛夷旗騎赤豹  
從文狸皆與楚詞合其他服飾器具亦處處有來歷末幅終  
以萬古名山斗室春畫任與姚某伯像其自負蓋不淺矣  
初八日從陶仲平段得毛詩惠丰農父子校本錄于別紙



言二  
三十  
初九日訪鳳生據云新有閩人攜宋本九成宮求售末有翁章  
溪跋幾二千餘言惜不及覲也

十一日錄毛詩校本訛計三十餘紙

十六日李子青來從游年廿三歲丁丑林歲入津

廿二日陶仲平來其尊人子春先生方撰沁村志屬渠顧訪商  
訂凡例

四月

初五日卽亭出示仁和趙晉齋金石目兩冊僅有簿錄而無攷  
證唐以後皆不載疑非完本也

十四日作周烈婦歲寒勁節圖詩序

五月

十三日東伴梧借鐵橋漫稿三冊

十五日得綾卿書並寄贈谷朗碑一冊又與菴屬寄靈樞兩冊  
託向翼甫借表綾階鈔本校一過

廿一夜閱焦里堂文集

廿六日陶仲平來以其尊人子春先生所撰貞豐里庚申見聞  
錄相質並屬弁言簡端

廿七日見謝佩孜知此間將設電報局

廿九日得驚莊書勝以方立遺書一部知在盛京岐將軍幕中  
司筆札五千里外得故人書喜可知也

六月

二十日訪希卿趁於十四日旋里即留朝飯午後同訪申季  
廿二日作重建大神廟記

七月

自前月廿四日至是月初四日因事未記初五日 家君  
痰疾復發初六即平復飲食如常不料初八日三更陡然  
大變手顫氣逆頭傾視深神思亦頗昏蒙急延賦琴診脈  
云全虛無實汗脫之變旦夕可危聞人參等品即服其藥  
時熾 五中悸裂手足無措東蘇康吉皆來問疾知病不可  
為分出料理後事延至初十日連服人參熟地等劑夜間  
忽清爽索粥甚急應對如平時方謂服藥有效可期無恙  
迺鷄鳴後達蒙如初平明汗下如雨易衣兩次盡溼十一  
日午時竟棄 不孝 而長逝矣嗚呼痛哉此後長為無父之  
人矣十二日小斂十三日大殮十七日首七廿四日二七  
循例追薦 不孝 自初八日起晝夜未交睫十三十四兩日  
略寐十五日忽聞紫薌母舅驟然中風十六日竟逝三妹

是日暑閉竟日方甦不孝哀痛積勞之餘屢遭驚悸夜間  
肝陽驟升口噤手足皆木自知勢不佳即於次日請賦琴  
診脈靜攝五六天服藥七八帖至廿六日精神稍安補記  
於此

廿七日欽敬夫來與商出殯時却廳事東壁據云東方歲煞不  
利月煞更不利在喪家慘觀閨凶固不暇有所顧忌而賃戶  
關係匪輕因求張頌擇向紫陽調停開南北方出入既直截  
於形家言尤妥當也

閏月

初二日東研農取歸請禮通致全部

初七日駸卿來

初八日託摺園售脫書五部

玉海 杜詩 楊州府志

新刻兩

經解鈎沈計

洋二十元書雖不精價亦甚苦為喪用計不得不然也

初九日託襄鄉售脫書三部

唐類函

唐詩別計洋九元

廿六日紫陽讓空廳事屏牆竟日午後自寫神主

廿七日領帖一日申刻舉襄停柩昌善局

廿九日赴昌善局奠拜安置銘旌孝幃等物

### 十月

初一日知渭漁新得潮州府志館

初九日陶桂門先生粟主入祠晨往拜

十二日得卹亭書送至方言疏證一部

十四日卹亭伴來送寶鑑齋集一部

十六日聞陶堂訃駭絕

### 十一月

初二日墻戶吳逸堂來因招星谷舅與談明春葬費黃昏始定  
局計開金井接扛登位圖冢種石楠十一株填平羅穴石灰  
上水挑山黃泥外葬謀兒柩一具計洋三十五元搭廠每方  
三百五十文踏作每日夜四班每班每人七十文柩船一隻  
亦在包款內

十二日作祭高東彝文一首代其門下士夜返舍見緩卿自鄂  
寄來輓陶堂詩數十韵沈雄悲壯酷似洪北江

廿五日廿三夜四鼓長元學大成殿災寸椽不遺兩廡獨無恙  
羣疑其致火之由竊謂殿門常年扃閉除春秋丁祭及朔望  
洒掃會無人擅入斷無遺火之理此必匪人縱火無疑然欲  
圖搶火乎此間無物可貪謂有叛民乎何不竟焚衙署而獨  
與庠校爲難謂校官之怨家乎則當焚其住宅揆情度理皆

非事之應有夫當今之世敢與吾道為敵而又勢不並雄者  
固有人在當道諸公大約亦不欲深求即求而得其主名亦  
安能澈究異端盛而正道衰惟此為甚矣

十二月

初三日訪卽亭見舊刻國語曾文以為宋刻其實明初本也

初六日得卽亭書贈明季白羊山人集一冊

初十日得申季書借六書故

十一日知絺卿已言旋

十二日周師來屬撰師仁堂楹聯

十三日致周師書送去師仁堂楹帖一聯

師有客民高眾之家  
仁以愛人利物為心

十六日致絺卿書得覆見貽唐張氏墓銘六紙

十七日倪思勉來屬題其尊人載酒亡詩圖以制辭

壬午正月

十一日王柳堂送其弟來附塾丁生敬淵亦來從游

十三日午前至昌善局扶柩下船復至仁濟局附載譔兕柩命僕押令先開熾別備一舟偕五叔岳隨行抵埠將曠黑未及登岸墳客吳逸堂下船飯

十四日請柩登岸開金井搭廠八叔弟偕地師欽敬甫陶鑛堂來舊有羅穴皆命敬視羅城約有六七處然過踏作皆曲折繞道牆身及前後和無纖毫驚動以是知灰及烏樟其利甚鉅使用白雲葬法則不可問矣

十五日寅時請柩登位隨即封家慈壽穴譔兕柩在西南界石旁結一小塚天既明八叔偕地師先歸鑛堂留督工是日早夜踏六作每作裏六班外兩班四寸毛灰踏二寸慈闈



壽穴以金門檻中線起除去八尺木一直開下闊四尺進深一丈四角有記碑為度

十六日朝夜踏六作初鑄堂以灰多泥少恐不結實改用四分灰六分泥役者皆唯唯及至第六作將竣鑄堂量其灰寸竟照樣籤短去五分狡獪技倆可謂神出鬼沒雖與閹爭亦徒費唇舌耳希卿偕其族兄來

十七日牆身既竣踏海漫四作七灰五寸半復因先祖慈用事

時石灰較少海漫未平補踏一作午後偕鑄堂至鳳巢湖步寺在山半老僧應客頗不諳世情寺門外有泉一泓極清冽吳文定公讀書處亦不可問悵悵而返

十八日踏統漫兩作人加倍午刻告竣役者皆赴貴川看賽會因偕五叔岳登姑蘇臺有深淵色踴碧山多赤石似土硃攢

兩枝歸舟

十九日園家看擺脚後即開船迂通至上方山掃墓薄暮始歸

二月

初一日五妹議親曹氏今日文定曹君召賓賢科業新進其家  
住敵廬之西江生標來從游師亭所薦

初九日知縣生桂彈章校書之事大約作罷論矣

十五日致心吾書屬抄王子雍易注等書

十八日袁帥雲來方言疏證抄竣計洋六元錢一百文

十九日嚴漸如來持到縣生面定刻左傳補注蘇地寫樣圖省  
上板

二十日丁生來云金君驥甫能寫影宋因取汪刻郡齋讀書志  
及抱經堂本白虎通義令依樣各寫一種以定優劣

廿三日致丁生東取到金君字樣筆意方勁雅近平原極合格也

廿五日致翁生書翁生前面言新得陳芳林春秋經傳集解袁氏貞節堂舊藏又得四錄堂原校本北堂書鈔叢書諸鐵橋漫稿有此書跋尾知卷首有雲章閣鈎佩齋收藏印中用丹筆校者王石華也又有洪筠軒校筆其書後歸錢塘何夢華如係此本洵可寶貴矣

廿七日黎明人聲鼎沸出視知後巷管姓失慎與舍間僅隔數武幸中間一高阜屏蔽可無妨既熄往視其家前面計焚三間後面兩間同時燎原不知火從何起其為匪徒縱火無疑復至舅氏相與慰撫午刻有無人某足踏兩木高五尺餘其行甚速至白鵲觀倚於牆手可及屋檐觀者如堵好事者即

指為縱火匪類指交地保及晚萬邑尊到場復勘帶往訊究  
竊謂晝夜為非日間招搖於市必無如此愚騷真李代桃僵  
也惟其人異言異服亦非善類非江湖走解即失業津漫如  
訊無實據正當驅之出境耳

三月

初一日費此懷來以其祖耕亭先生手書冊頁屬題

十二日得鄉生書並寄來徐李二家書目一冊將屬金緝甫寫  
定付棧

十六日午後訪卽亭借士禮居刻毛李二家書目閱卽抄如鳳  
石得南書房

廿一日作文選旁證跋卽亭謹諄許星臺方伯新刊四六叢話  
成卽亭復慙慙刻此書

廿三日作彭蓮塘先生行狀一首代其子保乂原來節略順理成章稍為刪潤即楚楚可觀

廿四日作彭君補齋行述一首彭君為蓮塘先生次子庚申殉難

廿五日燈下作彭公春湖行述一首作今粵東有戰績

廿七日此懷來以洪稚存所著四史發伏兩冊屬為校正將寄崇文書局刊行此書顧氏小玲瓏山館曾刊板然流播絕少

四月

初三日訪申季託校四史發伏又訪曾文渠新就鄂省志局聘行有日矣

初十日作徐小畧年文賦彙序一首為郎亭提刀

十一日作曾氏明瑟山莊圖書後一首亦代郎亭

十七日聞金靜之徵君陳培之農部相繼作古

三十日新吾來交節鈔玉函叢書二種復付春秋禮記論語孝  
經子部儒家計五本

從節卿處共借九本餘四本皆鈔本

潤筆四百廿文屬新

吾墊付

五月

初六日晨赴申季茗約與談郎亭館事申季本欲北行而郎亭  
急於延師此真一舉兩得者

初七日致郎亭書定申季館龔佑之來從游

初八日佩鸞韶臣來欲暫租敝廬大廳茶廳兩進設書塾即允  
之得申季書知郎亭今晨親往送聘定十一日行

初十日申季晨來話別得郎亭書並還經典釋文校本

十三日毛錕庭來取札模兩本將寫樣寄閱與左傳補注並雕

十六日得鄭生書見贈復初齋集一部又附到鴻詞題名錄通經傳經表垂詢可否重刻兩表已刊入式訓堂無庸更議題名錄則以俟將來可也

十九日至綠蔭堂託售復初齋集復購定式訓堂叢書一部廿二日致此懷書借江陰縣志得覆知筱珊因病未考差在京集賢刻書萬善花室集將藏事矣

廿八日返舍連得鄭生兩書並翁覃溪校佩觿一本簡端一跋尚是蘇齋手筆有劉文淇印益孟堅先生集藏也

六月

十二日此懷來云將北行應京兆試午後往誨別江建霞來云新得陳寶父先生家友明手札中胡竹邨多至數十通段若膺一札已抽去是可惜也

廿三日得希卿柬知於二十日歸並贈草堂詩箋一部

廿六日昨翼甫來贈袖珍段注說文一部

三十日得鄉生書寄來鐵橋漫稿三本囑寄昌理齋發刊

七月

初三日得鄉生書並千頃堂書目十七冊真趣齋書目一冊字  
學正說一冊

初四日覆鄉生書並寄新舊唐書補葉又寄翼甫書借吳淩雲  
遺著六九齋撰述昨致金緝甫書託寫李滄葦書目今晨得  
其覆書復附去圭盒詩錄一冊新吾前日來方言疏證抄好  
一冊計五卷六萬二千二百七十一字

初五日得希卿書送來賑捐百元託交電報局附去玉函山房  
叢書九冊方言一冊



初六日得建霞書附來陳碩夫先生冊葉一本

初七日至察院場偕季雲篆香兩同年茗話篆香近寓鄧尉聖恩寺云有僧通智者阮文達之孫晏尚書之婿精通三乘彼教中一大智識也

十五日訪渭漁茗飲據云初至粵幾至進退維谷不得已以一詩投建陽大蒙青眼其薦士書有蒼昊如求士呼空欲薦賢意畢尚書朱學士後安得有此人哉

廿五日訪蒔卿見正德辛巳存餘堂刻庾子山詩集四卷又抄本姚牧庵集江湖小集明王履約集庾集有葉樹蓮撰學齋朱記葉石君藏書也中有抄補十餘葉蒔卿謄係石君手筆

八月

初一日得純卿丈書贈新著通鑑校勘記一部復得鄉生兩函

昨來明隆慶刻本家語四冊又簡明目錄三冊周季貺傳節子以所見古本乃得諸序跋稱引者注於上下方頗有宋元舊本可備采也

初三日得以莊書並計一面驚悉其尊人人第先生七月中遽歸道山來徵祭文卻之不能而孱軀若此又焉能握管也

初六日賈丈來談自鄂新歸據云鄂中局面尚好而總纂不得其人傾軋之風亦甚得申季書知今科南四仍有一千光景  
初九日作薛人第先生祭文

初十日得鄉生書附來保越錄一冊大興傅節子長恩閩鈔本又贈夏小正戴氏傳一冊亦傅君所刻以琉球綿紙印精墨極精

二十日得鄉生三面並丁氏持靜齋書目一冊明刊晁具茨集

一部

廿三日作陶子春先生貞豐里見聞錄叙

九月

十五日晨訪希卿送別南梅信渭漁再韓禮卿皆獲集

十七日得鄭生書並左傳補注新刊本三卷及蘇詩查注補正

姑蘇名賢小紀午後子樞同年在芍齡齋招往談見北關全

錄常州陸惕身丹陽周松齋俱獲集今年北梅可謂得人而

申季獨見遺不能不為司衡者惜也

三十日得鄭生書見贈竹柏山房叢書又寄來咸淳臨安志樣  
本二冊價泉六千小字本藝文類聚陳禹謨本北堂書鈔樣  
本各一冊價洋六十元余因擇臨安志留之其餘兩種直昂  
出人情之外不敢問津也

十月

十二日得薌生書並紅雨樓書目南薰圖家致各一冊四書典故核四冊得建霞書其友人託銷天一閣書目文選樓本因即留之價洋三枚

十七日見再韓談及今年閏中頗重二三場易執用諧聲者必薦薦必售渭漁經執禮卿策皆進呈此懷來長譚

二十日得薌生書並見贈咸淳臨安志念肆冊陳恭甫校逸周書一部何氏學一部受之無名辭之不情頗為難也

廿九日得建霞書以新刊留溫吟館詞一冊見贈

十一月

初九日得薌生書附來季毛書目一冊瓊川吳氏經學叢書零

種二冊

廿一日得鄉生書並孫氏經說一部讀經校語一部經傳釋詞一部

廿二日得韜仲函贈古文四聲韻一部又增來青桐軒易緯一部渤海葉仲恂稟龔撰其書多以人事言易為楊誠齋流派廿八日作費畊亭遺墨序一首又作傳是樓書目小引並作書覆中季附去圭齋詩錄一本

十二月

初一日覆鄉生書並附去金緝翁寫季目既又得其三楮並羅一峰虞道園集各一部天一閣書目一部經解雅稿十餘冊購尤舞漁子鈔朱樂園餘稿三冊價洋六元為鄉生又劉敏中集五冊後有陳仲魚顧澗著黃範圍三跋皆從傳錄時摹入非真蹟也

初三日日晡訪此懷見明許亢祚手卷臨黃庭經蘭亭序綾本  
憶小玲瓏山館所刊替瑞題靈長子許光祚訂即其人也

十四日得鄉生函附來左海補葉又得沈子伯書附來鄉生箋  
件內六書會原六書正義三禮名物攷西京雜記弟子職鐵  
橋漫稿六九齋刊本

十八日得建霞書知明年就鄂中高學使館

廿一日發陝西信辭撫幕館

癸未正月

初十日伯英表棣來從游

十一日致小劉師書辭程氏館

十七日得壽卿書知前函已達馮中丞一切如約並許兼一書  
啟再兼一志局約可歲得千金棄之可惜且負良友而赴之

則家累羈身鞭長莫及轉展思之真進退維谷也又得雅賓  
師書藻翁必欲相浼許減徒益脩又得西園師書朱研翁需  
人裹校來詢往否瀋陽之役過於咸京更不合算矣

二十日囑鄭文公碑一張價英餅一枚致閩中函附去左傳補  
注一卷吳中名賢記一卷汗筠齋叢書六冊

廿二日常州陸惕身來將赴禮部試

廿三日連得鄭生三書並尚書攷偽一部

廿六日顧虹玉來領其徒吳君守樸脩士相見禮

廿八日滬上遞來閩中篋包三件內左海後集五部義門題跋  
尚書攷辨各一部又紛欣閣叢書兩種心齋十種一部又經  
韻樓叢書一部十八元為余代購

廿九日午後訪紹卿未見歸知亦來相訪留字述吳希玉願就

節署一席因決計讓之

二月

初一日晨訪申季約定偕純文同赴海虞初三登舟

初二日孫得之來以舊刊埤雅一冊見示紙色古雅而宋諱都不缺筆疑是元板得之又云家有通鑑外紀節要木石子俱孫淵如藏

初三日晨申季來同登舟純文後至即解維風不順夜泊墩頭止其爾雅所謂如敦敦止者乎

初四日偕純文登岸先造其廬既至石梅磯茗飲又至書肆間步見顧君鈞陶係澗琴同年之弟偕赴酒家小酌午後同出邑西郭游趙次侯園亭種梅二畝許暗香疏影頗極幽靜既僮筍輿入虞山游三峰清涼禪寺登樓望海狼山諸峰隱約



可見老僧藥龕度藏書畫極富惜匆匆未發其蘊坐談久之  
同人復擬游破山禪院天已曠黑且有微雨因即入城至潤  
琴處夜飯而下歸舟

初五日早起偕申季訪純丈走伴招顧鈞陶同下舟放棹游尚  
湖午刻至西山為虞山盡處有小雲棲禪院寺後有石洞寬  
廣約一間屋洞中有露珠泉清冽異常投以石深不可測同  
人煮泉憩飲復各汲一甕命邨人負之歸有言大石洞之勝  
者云離寺理許洞深遠不計尋丈故老相傳通陽羨間之即  
鼓興往游導游者三人各執一燭初入極寬廣稍進一石下  
垂俯首進約周圍十餘丈已窮其極所謂通陽羨者真爛語  
耳興未盡偕申季直登山巔俯視大海了然在目有濃煙一  
縷起於天際夷人輪船也日曛始下舟歸至東門外通邨人

演龍燈登岸縱觀假裝諸雜劇怪怪奇奇亦足以發一噱純丈鈞陶二鼓始登岸

初六日早晨偕申季訪純丈即同下船解維至蘇里日哺始到見瞿敬之丈及隸卿昆仲主人萬分情重即僕被上岸暢談至三鼓始睡隸卿以新得左傳杜注見示宋板元印桓構等字皆缺筆又見憚壽平文衡山山水長幅

初七日午後告別登舟申季借宋刊讀教記一部余借宋刊文子影宋刊輯古算經抄本祕書監志錢曾王陸穀先手校說苑各一部日哺抵常熟東門外純老即進城

初八日歸棹大風抵暮始進婁門臨行向純丈借孔蒨谷水經釋地四本韓詩外傳兩冊楊詠春先生所校

初十日夜芍齡來云翁亦泉貝康侯之子欲來從游受翁而卻

貝即為君意也

十二日王于如來從游名鳳藻佩鶴舊徒貝蔚如來其弟欲來問字以鄰誼不得辭許達三六九到塾

十三日得鄉生三書藝文類聚廿冊南江札記一冊周禮儀禮古訓攷一冊葉文敏公集八冊天祿琳瑯十冊

十四日覆鄉生書辭校勘館

十五日得中季東即覆之並增去鐵橋漫稿二卷託校正覆鄉生書增繳三禮考一冊購吳刻韓子四冊賈三元篋中舊有晏子合之遂成完璧

十六日貝蔚如送其弟來上塾名履泰字哉安年十八歲

十八日購苔溪漁隱叢話一部賈兩元

廿一日何壽林貝蔚如先後來薦榮陽館

廿七日訪貝蔚如辭榮陽館

廿九日南母舅招游天平純丈喬梓和臣蓮士同行先至無隱庵茗憩謁范文正祠堂即循山麓登中白雲倚石稍息至下白雲煮泉清話山僧雲閒能操琴作小指方書密行扇頭娟秀有閨閣氣壁間有茶唐山人詩歸途曠黑矣

三月

初二日翁印若來執贄

初八日吳俊卿來持到醉文書聘金二十兩述鄭庵尚書意延課其介弟

初十日王于如偕盛生蔚岑來問字

十一日吳培卿來述河陽必欲見招敦迫再四即行定約而去  
十二日致薌生函再辭校勘館增去紅本六卷簡明目錄三冊

三國志圖一冊

十六日得希卿書為河陽勸駕

四月

初一日慈闈肝氣作管沁梅為占課得革之豫卦據古用神不弱可無大患惟日內未能即愈因往延鮑竹蓀診脈

十二日鳳生自清江歸述該處齋匪頗張民風勁悍好鬪輕於犯法徐仁山觀察取卧碑文引經箋注又取大清刑律繪為圖說分布各屬以教士民各作一序屬為刪改

十三日陶升甫來携至陸存齋出售書目一冊內有宋板朱子大全集范文正忠宣集元板元印玉海元板禮書表後禮經附藏會元索價頗昂非寒措大所能問津又有鈔本秘書監志索三元則余已有其書矣

十六日得市卿書端端於塵寰之謫至自分作老鄭虔其有夢  
於鶴梁乎

十七日在鳳生齋見初撰碑塔銘神彩畢現得未曾有有高澄  
人藏印

廿一日訪此懷陳所藏書畫見示有趙王孫高士圖前有俞木  
紫芝詩本是題後而市估移於前者又有暴書二字亦子昂  
筆後附孫伯淵詩四首本平津館物此懷得之將以畧其齋  
又有董華亭墨蹟沈启南畫幅湯雨生畫尤多

廿二日洞甫來云丁生竟於前日作古為之駭咤丁生營年嗜  
學自來從游每閱數日呈一藝必有進境決其為遠到才豈  
知天不永年乎

廿九日丁欣然來述丁生易箒前數日夢一老人飲以五色汁

甚甘醒即自知不起梓播後事纖悉不遺嗚呼傷矣得此懷  
書贈潛研堂集一部得都中信知希卿散館二等四十恐不  
免竊降臺案矣為之三太息

五月

初二日熙年在秦年丈處招往談云鄭金尚書明日將杜駕舊  
渠關照因先施之略談即返

初三日鄭金尚書來未晤

初五日閱師抄第卿果改部曹

十八日杞懷來携黃鶴山樵畫卷見示後附明胡若思 履解大  
紳 結記兩首退樓主人有題字

二十日到館尚書贈滂喜齋叢書一部

廿六日題江夫人畫卷五律兩首

廿九日作顧恭人傳得孫得之書應卽亭之聘將赴山左校文  
卽亭新得是省學差

六月

初一日新吾處鈔件計竣天祿琳琅五冊徐興公書目一冊祕  
書監志兩冊先後付洋五元餘錢一百九十文

初九日致渭漁書屬影鈔持靜齋藏宋本佩觿

十四日得苾卿書知壽卿新補渭南卽亭屬招申季赴齊襄校  
申季館卽余所薦狐狸埋之而狐狸之萬無是理

廿三日得申季書同治府志三部余得其一兩部分贈質綬

廿四日得質文書屬繳抄本澹園集

廿八日建霞來云陶子鎮編修藏有大藏音義爲諸儒未見之  
本共一百卷從其中搜緝倉頡篇逸文較孫伯淵所刻者多



至兩倍許慎淮南子注亦一鉅冊他可知矣編修甚祕其書不輒示人又以翼甫所作送行序並詩四首見示

七月

廿五日自前月廿九日以後因慈闈大病心緒怠劣未記其間屬新吾權館半月

廿八日學作篆隸定為日課

八月

十二日建霞來云月內赴山東學幕作七絕兩首題袁伯英長江詠月圖

十三日得建霞書論祥禪之異頗有折衷邗來新刊金山錢氏書目內有文子校勘記謂文子皆襲淮南子歷舉兩書文同者條分縷晰抉摘精審其見甚卓然是書自唐以來不廢今

所傳注且有三家則未可以偽而棄之也文子明代刊本有道潛堂刻吳勉學二十子本國朝有續義本守山閣本旅里瞿氏有朱弁注鈔本徐靈府注有四庫著錄本擬會校作一扎記惜借書難耳

十七日校新刻文子

十八日購定孫刻古文苑一部邵校施注蘇詩一部精印均極精價五元半

九月

廿二日禪祭釋服

廿四日校寫本新序據百宋一鑒賦注是書有兩宋本一為紅豆舊物一為顧大有舊藏罍里瞿氏有蔣子遵校本即出自兩宋槧余曩年曾假得錄于南宋本上茲為香生重刻海內

新序當推此為第一矣

廿九日購開有益齋讀書志一部上元朱述之撰頗有益於目錄之學

十月

初七日閱文選李善注將文子新序等書凡十餘種別紙錄出以備校勘新刊本

初九日得電而信壽卿竟鐫職

十五日以續義本校新刊文子宋本首卷即有脫簡其餘訛奪亦多實非佳刻但徐靈府注道藏外單刻本惟有此種不得不以希見寶耳

十六日得緝甬東附到新刊陸宣公奏議郎注一部姚公夢瑩贈此書歸安陸氏有新刊本從翠巖精舍本出姚本從別一

元本影雕

十九日曲阜孔某持此懷東以新舊搨漢魏六朝帖來售擇留  
王基殘碑曹真殘碑吊比干文共三種

二十日得新吾東並明刻新序兩本

廿三日孔君來又購定樊敏碑倉頡廟碑仙人唐公房碑張壽  
碑共四種

廿四日五妹納徵

廿八日舍妹吉期將近解館十日屬新吾權課

十一月

初二日五妹于歸譙國新聲名寶賢字俊卿元和諸生

初六日訪學生不值觀其新翻碑塔銘非非有神與原本不損

毫髮

初七日至此懷齋觀蘇文忠墨蹟兩種皆過雲樓物一為乞居  
常州劄子一為祭□□□文復有沈石田文衡山董香光諸  
人跋又見校本左傳補注謂錄自馬應潮珊瑚林蠅頭細字上  
下幾滿

十一日此懷來贈樓帖兩種過雲樓刻

十五日東申季村去世德堂六子一部浯亭銘一紙

十六日暮書估陳某來持袖珍方見示前繪處犧神農黃帝像

洪武二十四年周藩序

脫二字

十年民臣熊宗立重刊序周

藩序云邇來雲南集縣經驗訪方命工刊梓以廣其傳是始  
刊本在滇中熊序云里中同志劉文□詰京師敬求足方全  
帙而歸宗立命工續梓則是書已是覆刊本矣書估割去洪  
武及重刻年號偽充宋本索價二十四元可笑也熊序自署

民臣亦從來所罕見

十九日從純文借義門手校本揚子法言二冊溫公序故相宋公庠家有李祠部注本及音義最爲精詳音義多引天復本未知天復何謂也義門校其上云李軌註法言十三卷音義一卷今虞山錢氏尚有家刻或是當時國子監所行本也又云天復爲唐昭宗紀元則李祠部疑爲石晉之人後人不察以爲典午之代復爲柳州補注以附益之耳柳州答韋珩書頗輕揚子其不爲注也決矣溫公專信揚子之過以爲法言東漢已行注者不宜始自近代遂不致疑也客卿無隋書可質李氏書之真偽姑記之己卯章月清苑行臺書棹又云隋書經籍志侯芭李軌注皆著錄芭書亡矣然則音義疑自後人補之柳注之偽無可疑也殘牘又記末卷跋云絳雲樓舊

藏李注揚子法言序篇在末卷未清本書次序後轉入泰興  
李氏又歸傳是樓康熙己亥心友弟偶獲見之略校訛字寄  
至京師冬日呵凍自校此本他日餘兒苟能讀之乃不負二  
父殷勤訪求善本以貽後人之意也老潛記

二十日曲阜孔某持裴刻虞溫恭公碑求售索價花信之半又  
渤海刻樂毅論黃庭經滋蕙堂刻靈飛經皆新搨不甚佳其  
裴刻溫公碑結構謹嚴且是全文重刻本洵為翹楚然以宋  
拓雙鈎本較之則神韻已大遜古人臨池必求原刻精搨信  
有以也

廿一日綠潤書估持抄本鐵莊集來據前無名氏序其人與魏  
冰叔顧宛溪友善國初遺民也題句吳陸楫

廿二日得芾卿同年兩書並句容陳卓人公羊疏證一冊屬求

鄭金尚書交書局刊行

廿三日訪襄卿康吉茗飲同至石塔頭唐寓看出售書籍聽事  
三間牙籤羅列惜皆官樣文章漢學家言尤少襄卿選得明  
刻韓魏公集曹子建集余購定唐藩翻張伯顏本文選弘治  
刻止齋集元刻音釋柳先生集明刻老莊口義計實費銀貳  
廿三枚又有明經廠本名臣奏議亦佳惜價昂不能得

廿四日檢點新購書柳集四十一卷缺大半餘亦斷爛甚多重  
是元刊當从旅里借本抄補老莊口義以明福清施觀民合  
刻三子口義尚有為最善今本題宋寶謨閣學士主管玉局  
觀鴈齋林希逸注明吏部左侍郎兼翰林院學士鳳磐張四  
維校賜進士工部營繕司員外郎鳳隅陳以朝次板心有敬  
義堂刊四字莊子附釋音一卷又附總論補注據第一卷後



記云錯簡脫陋則按郭本通義補之至分卷上下多從郭本  
蓋內篇外篇雜編既分為三則外篇不當與內篇作一卷也  
學者詳之觀此則篇序次第已非復林氏之舊余藏簡明目  
錄周季貺批云別一明刻脫誤甚多當卽指此本也末有景  
定改元中和節宣教郎知邵武軍建寧縣林經德序兩書首  
皆有庸齋發題外又購揚子法言兩冊分卷與世德本同紙  
墨甚古狹行小字非元刊卽明初本也

廿五日因老莊口義非佳本換購歐陽文粹袖珍方各一部文  
粹明郭雲鵬刻附遺粹十卷雲鵬復有仿宋河東集爲世所  
稱道者也袖珍方分文行忠信四集卽抱經堂將來之本實  
價三元一經書估涉手便增至廿四元其謫如此

檢丁氏持靜齋目亦有元刊柳集題宋本音釋柳先生集四

十一卷別集一卷外集一卷與新得本一一脗合余本更多  
附錄一卷

廿六日陳估來索袖珍方頭本不與則大形聲色竟為持去以  
山淵堂刻通鑑外紀一部作質

廿八日得孫浚民及建報山左書樓云山左銅器極多兩君及  
惕身各有所得浚民在靈石曾見楊氏宋存書屋書目執笑  
士禮所藏大半在其中也

十二月

初一日得純文書屬題翁烈婦行校楊子以世德本對照何校  
本

初三日抱經書估來云新有人以沈小宛王荊公詩補注手稿  
覓售又有吳尺鳧校楊子屢屬其送來而未果據云亦出治

言二  
早本無甚異處也

初四日校臨楊子訖第三卷之後又有此瞻先生一跋云此本每條之首有朱筆一點及乙處皆安溪先生取以入榕村據授本中後又命其于世得與焯稍刪其可緩者亦增以未備者凡二條焉後人得之者而珍視諸己卯除夜清苑行臺西箱記焯

初六日午後階純文申季至唐宅看書復購定李詩補注一部明許自昌刻本又韓魏公集亦明刻本其餘可采者明劉維刻史記萬曆元汪克寬本綱目嘉靖刻源流至論正統補刻前後漢書並以價昂不能得

初九日以成化刻文選換證類本中一部亦成化刻

初十日鄭僉尚書贈新刻韻補一部又新刻葉調生文樸花庵

詩集並得此懷東陳用錡屬綴袖珍方

十三日東純文託綴菰里文子一部又附去新得柳集一本屬交棧卿與藏本比較如出一本借鈔閱景

十四日鄭畫文贈續溪胡氏著書三種

廿三日得直清東還左傳補注一冊地理補注兩冊鄙人年餘僅完兩本而此三冊不過一月工夫可謂神速

廿七日得翼甫書並贈張廉卿先生文集一部

廿八日得申季書贈新刻書錄解題寰宇訪碑錄各一部

廿九日碩庭東來贈其先德花隱齋遺稿一部

緣督廬日記抄卷二

女夫王立勛謹繕印

邑後學潘承鵬謹校

錄督廬日記抄第二冊校勘表

葉次	行次	格次	誤	正	葉次	行次	格次	誤	正
四	一	三	詩	詩	十九	十七	十五	平	立
又	九	三	詩	詩	二十	十八	二	从	作
六	一	八	頌	頌	三十四	十八	七	同	(衍文刪)
九	三	十	志字	(增志字)	三十七	七	五	驚	驚
十一	十一	廿四	秩	秩	四十六	二十三	四	舞	舞
又	十二	三	秩秩秩	秩秩秩					
又	十三	六	秩秩	秩秩					
又	十四	二	秩	秩					
十五	二	十九	子	字					
又	八	十二	經義	校經					

第二冊校表